

Timersornermik aallutaqartut timersornikkut aaqqissuussani peqataanerminni sulinikkut isertitassaraluaminnik annaasaqartarnerat qanoq matussuserneqartarsinnaanersoq pillugu apeqquteqaat aallaavigalugu oqallisissiaq.
(Inatsisartunut ilaasortaq Peter Olsen, Inuit Ataqtigiit)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut Inatsisartunut ilaasortaq Peter Olsen, Inuit Ataqtigiit, timersornermik aallutaqartut timersornikkut aaqqissuussani peqataanerminni sulinikkut isertitassaraluaminnik annaasaqartarnerat qanoq matussuserneqartarsinnaanersoq pillugu apeqquteqaat aallaavigalugu oqallisissiaanut qutsavigaat.

Siunnersuuteqartoq timersornermik aallutaqartut nunatsinni nunanilu tamalaani aaqqissuussani peqataasut sapinngisamik qanoq pitsaanerpaamik tapersersorsinnaanerivut pillugit pingaarutilimmik apeqquteqarpoq.

Taamaattoq timersornermik aallutaqartut kisimik tapersersorneqarnissamik pisariaqartitsinngillat. Timersornermik aallutaqartoq siunnersuuteqartup erseqqissagaatut sungiusaasumik, sungiusaasup ikiortaanik, holdimut aqutsisumik minnerunngitsumillu kajumissutsiminnik sunngiffimmini tapersersuisartunik sulinikkullu isertitassaraluaminnut akilerneqaratik taarsiivigitinneqaratilluunniit ikiuuttartunik pisariaqartitsivoq. Tamakkulu ikigisassaannngillat.

Timersornermik aallutaqartut pikkorissut nunaqarfimmini, kommunimini nunatsinnulluunniit maligassiuusuulluarput. Timersornermik aallutaqartut illoqarfinni pissartanngorniunnerni, nunap immikkoortuini pissartanngorniunnermi, Nunatsinni pissartanngorniunnerni peqataasut imaluunniit nunani tamalaani timersornikkut aaqqissuussinerni, soorlu Arctic Winter Gamesimi imaluunniit Nunarsuarmi pissartanngorniunnermi aamma Olympiske lege-nut nunanut allanut unammiaartortartut akornanniipput kajumissutsiminnik, nukimminnik, sunngiffimmini feeriassaminnillu atuisartut.

Taakku tulluusimaarutigaaavut. Ataatsimoornermik, ataqtigiittut misigisimanermik pilersitsisarput, nunatsinnilu inuiaqatigiinnik katersuutsitsisarlutik.

Aningaasanut inatsimmi konto pingaarneq, 40.94.13 Timersornermut tapiissutit (Tapiissutitut aningaasaliissutit) aqqutigalugu sulinikkut isertitassaraluanik annaasanut tapiissuteqartoqartarpoq. Oqaasertaliussani takuneqarsinnaavoq "Aningaasaliissutinit 1.250.000 kr.-t nunani tamalaani suliaasanut immikkoortinneqarput, taakkunannga 550.000 kr.-t nunatta unammisartuinut sungiusaasut, nunatta unammisartuinik aqutsisut akissarsisinneqarnissaannut kiisalu peqqinnissaqarfimmi sulisut akissarsiaannut aningaasartuutitut tapiissuteqarnissaq pillugu qinnuteqaatit naammassisinnaajumallugit immikkoortinneqarput. Akissarsianut aningaasartuutit 50 %-ii angullugit tapiissuteqartoqarsinnaavoq. Ukiumut 2-riarluni qinnuteqartoqarsinnaavoq 1. januar kiisalu 1.

juli. Aningaasaliissutinit sinneruttut 700.000 kr.-t Kalaallit Nunaat sinnerlugu nunanut allanut unamminissamut A-mi peqataatitaqarnissamut atatillugu sulinnigiffeqarnermi annaasassanut tapiiffigineqarnissamik qinnuteqaatit naammassinissaannut immikkoortinneqarput."

Aningaasanut inatsit naapertorlugu Elite Sport Greenlandip timersornermik aallutaqartut sulinikkut isertitassaraluaminnik annaasaannik akiliuteqartarneq pisortat sinnerlugit isumagisarpaa.

Elite Sport Greenlandip ilisimatitsissutigaa nunani tamalaani aaqqissuussanut 1.250.000 kr.-nik aningaasaliissutini 550.000 kr.-t nunanut allanut unammisartut sungiusaasuisa il.il. akissarsiaasaannut immikkoortinneqarsimasut. 2023-mi akissarsiat 688.897 kr.-t 2022-milu 613.178 kr.-t tunniunneqarsimapput. Taakkunanga 1.250.000 kr.-ninit 700.000 kr.-t timersortartut nunanut allanut unammisartunut A-nut aaqqissuussani peqataanissaannut aningaasartuutitut akiliutissatut immikkoortinneqarsimapput, 2023-mi 1.256.712 kr.-t 2022-milu 1.094.353 kr.-t atorneqarsimallutik. Elite Sport Greenland naapertorlugu atuineruneq ukiup siuliani aningaasanik atunngitsuukkanik akilerneqarsinnaasimavoq.

Naalackersuisut maluginiarpaat nunatsinni sungiusaasut saniatigut ilaatigut nunanut allanut unammisartunut aqutsisunut peqqinnissakkullu sulisunik akissarsititsinissamut tapiissuteqarnissamut periarfissat killeqartut. Naalackersuisut eqqumaffigaat nunatsinni sungiusaasoq aamma nunatsinni assammik arsarnermi arnat nunanut allanut unammisartut sungiusaasuannut ikiorti aningaasakilliorneq pissutigalugu soraarsinneqarsimasut. Tamanna uggornarpoq. Timersornermi atugassarititaasut ullutsinni nunatsinni pitsaanerpaanngitsut tamatuma erseqqissumik takutippaa.

Naalackersuisut maluginiarpaat ukiut tamaasa akissarsianut taarsiissutininik akiliutit annertusiartuinnartut. Taamaattumik kontomi pingaarnermi pineqartumi annertunerusunik aningaasaliissuteqarnissaq pisariaqassaaq.

Inatsisartunut ilaasortap siunnersuutigaa maannakkut immikkut ittunik suliniutinik aallartitsisoqarnissaa piffissanngortoq. Naalackersuisut tamanna isumaqataaffigaat. Suliniutilli nutaat akeqarput. Politikikkut pitsaanerusunik atugassaqtitsinissaq sinaakkutissaqartitsinissarluk kissaatigineqarpat, timersornermi pikkorinnerpaat nunatsinnilu holdinut sungiusaasut kontomi pingaarnermi siuliani nassuiakkama saniatigut illoqarfinni nunaqarfinnilu ataasiakkaani timersornermik aallutaqartut taakkualu sungiusaasui, sungiusaasut ikiortaat, holdinut aqutsisut il.il. minnerunngitsumillu nunatsinni kajumissutsiminnik ikiuuttartut aamma sunngiffimminnik feriassaminnillu atuisartunut aamma pisariqartitsisunut ilaapput.

Naalackersuisut Timersornermut Suleqatigiissitamik Timersoqatigiit Kattuffiannit, Elite Sport Greenlandimit kiisalu kommuninit sinniisulimmik pilersitsisimapput, taakku ukioq manna septemberip naanerani inaarutaasumik nalunaarusiaminnik tunniussissapput. Suleqatigiissitap timersornerup silarsuaani unammilligassat immikkut ittut periarfissallu erseqqissarnissaat siunertaraa. Suleqatigiissitap timersornerup silarsuaani kajumissutsiminnik suliaqartartunut atugassarititat qitiutitassaasa ilagaat, taamaattumik Naalackersuisut suleqatigiissitap timersornerup silarsuaani siunissamut ungasinnerusunut ineriartortitsinissamut siunnersuutitut innersuussutissai qilanaaraat.

Timersornermik aallutaqartunut kajumissutsiminnillu suliaqartartunut timersornikkut aaqqissuussani peqataanerminni ullunik suliffiusussanik feriarfiusussanillu atuisariaqartartunut taamaalillutillu sulinikkut isertitassaraluaminnik annaasaqartartunut atatillugu feriarneq pillugu inatsit ilanngunneqartariaqassaaq, pisariaqassappallu naleqqussarnissaa kajumissutsiminnillu suliaqartartut ilaatinneqalernissaannut tunngatillugu naleqqussartariaqarsinnaalluni. Tamatuma saniatigut feriarneq sulisoqarnikkut isumaqatigiissutini, tassa overenskomstini ataasiakkaani ilaavoq, isumaqatiginninniartartullu assigiinngitsut akornanni aamma isumaqatiginninniutigineqartariaqassalluni.

Timersornerup silarsuaani aningaasaqarnikkut sinaakktigineqartuni amerlasuunik unammilligassaartoq Naalakkersuisut eqqumaffigaat. Timersornerulli silarsuaani aningaasaqarnikkut sinaakktissiisartut tassaapput Inatsisartut.

Naalakkersuisuniit taamatut oqaaseqarluta inersuarmi soqutiginarumik oqallittoqarnissaa qilanaaraarput.